

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na 36. sjednici Predstavničkog doma, održanoj 19. oktobra 2016. godine, i na 23. sjednici Doma naroda, održanoj 27. oktobra 2016. godine, usvojila je

**ZAKON  
O OBILJEŽAVANJU MALOG ORUŽJA, LAKOG NAORUŽANJA I  
PRIPADAJUĆE MUNICIJE**

**I. OPĆE ODREDBE**

**Član 1.  
(Predmet Zakona)**

(1) Ovim Zakonom utvrđuje se obaveza obilježavanja malog oružja i lakog naoružanja (u daljnjem tekstu: oružje) i pripadajuće municije (u daljnjem tekstu: municija), oznaka na oružju i municiji, obaveze i ovlaštenja proizvođača, uvoznika i nositelja zaliha, evidencija, te nadzor i upravne mjere.

(2) Obilježavanju podliježu oružje i municija kod kojih se prepravkom zamjenjuju ili mijenjaju bitni konstruktivni dijelovi.

**Član 2.  
(Izuzeci od primjene zakona)**

(1) Odredbe ovog Zakona ne odnose se na oružje i municiju koje se do stupanja na snagu ovog Zakona, odnosno njegove primjene, u skladu s postojećim propisima, nalazi u posjedu Oružanih snaga Bosne i Hercegovine, organa i institucija svih nivoa vlasti u Bosni i Hercegovini, pravnih lica i građana, a koje je ranije proizvedeno ili uvezeno u Bosnu i Hercegovinu, osim ukoliko to oružje i municija postane predmet prijenosa ili izvoza iz zaliha svih nivoa vlasti.

(2) Odredbe ovog Zakona ne odnose se na privremeni uvoz ili izvoz oružja i municije, obavljen u okviru propisanih carinskih uslova Bosne i Hercegovine.

**Član 3.  
(Značenje izraza)**

Izrazi upotrijebljeni u ovom Zakonu imaju sljedeće značenje:

- a) ***malo oružje***: je smrtonosno sredstvo koje je izrađeno ili prilagođeno da pod pritiskom barutnih i drugih plinova ili drugog potisnog sredstva može izbaciti

zrno, kuglu, sačmu ili neki drugi projektil, namijenjeno za korištenje od strane pojedinca, koje uključuje: revolvere, pištolje i automatske pištolje, puške i karabine, automatske puške, jurišne puške, puškomitraljeze i lake mitraljeze;

- b) **lako naoružanje:** je smrtonosno sredstvo koje je izrađeno ili prilagođeno da pod pritiskom barutnih i drugih plinova ili drugog potisnog sredstva može izbaciti zrno, kuglu ili neki drugi projektil namijenjeno za korištenje od strane dva ili više lica koja mu služe kao posada i uključuje: teške mitraljeze, ručne, automatske i ispod cijevi montirane lansere granata, prijenosne protivavionske topove, prijenosne protivoklopne topove, bestrzajne topove, prijenosne protivoklopne raketne sisteme, prijenosne protivavionske sisteme i minobacače kalibra ispod 100 mm;
- c) **bitni konstrukcijski dio:** je svaki element ili rezervni dio koji je posebno izrađen za oružje i municiju i bitan je za njegovo funkcioniranje (npr: cijev, sanduk, klizač, zatvarač, čahura, košuljica i upaljač);
- d) **municija:** je pripadajuća municija za malo oružje i lako naoružanje navedeno u tač. a) i b) ovog člana, kao cjelina ili njeni dijelovi;
- e) **jedinstvena proizvodna oznaka – JPO:** je oznaka na svakom komadu oružja ili municije odnosno pakiranju municije, u trenutku proizvodnje, ispisana jednostavnim geometrijskim simbolima s brojevanim ili alfanumeričkim kodom, koja svim državama omogućava laku identifikaciju zemlje u kojoj je oružje ili municija proizvedeno;
- f) **uvozna oznaka – UO:** je oznaka svakog komada oružja ili municije odnosno pakiranja municije koja se uvozi u Bosnu i Hercegovinu, ispisana alfanumeričkim kodom;
- g) **oznaka o prijenosu ili izvozu - OPI:** je oznaka na svakom komadu oružja ili municije odnosno pakiranju municije koja se iz zaliha svih nivoa vlasti prenosi za trajnu civilnu upotrebu ili se iz zaliha svih nivoa vlasti izvozi iz Bosne i Hercegovine, ispisana alfanumeričkim kodom;
- h) **identifikacijska oznaka oružja - IOO:** je oznaka koja se stavlja na svaki pojedinačni komad oružja, u slučaju kada Jedinstvena proizvodna oznaka na oružju, u postupku odnosno trenutku uvoza u Bosnu i Hercegovinu, ne omogućava da se nedvosmisleno prepozna zemlja proizvodnje, ime proizvođača, godina proizvodnje i serijski broj;
- i) **identifikacijska oznaka municije - IOM:** je oznaka koja se stavlja na svako pakiranje municije, u slučaju kada Jedinstvena proizvodna oznaka u postupku odnosno trenutku uvoza u Bosnu i Hercegovinu, ne omogućava da se

nedvosmisleno prepoznava zemlja proizvodnje, ime proizvođača, godina proizvodnje i kalibar, i

- j) ***nositelj zaliha***: je državni, entitetski ili lokalni organ, organizacija ili institucija vlasti nadležan za upravljanje ili korištenje oružja i municije.

## **II. OBAVEZE I OVLAŠTENJA**

### **Član 4. (Proizvođač)**

Proizvođač oružja ili municije, obavezan je tokom proizvodnje označiti oružje ili municiju Jedinственom proizvodnom oznakom (u daljnjem tekstu: JPO) u skladu s odredbama čl. 9. i 10. ovog Zakona.

### **Član 5. (Uvoznik)**

Uvoznik oružja ili municije obavezan je najkasnije u roku od 15 dana, nakon završene carinske procedure, a prije stavljanja uvezenog oružja i municije u promet, upotrebu ili korištenje, u skladu s propisanom procedurom osigurati stavljanje oznaka iz čl. 11., 12. i 13. ovog Zakona.

### **Član 6. (Nositelj zaliha)**

Nositelj zaliha oružja ili municije obavezan je prije realizacije prijenosa odnosno izvoza oružja ili municije iz zaliha svih nivoa vlasti, u skladu s propisanom procedurom osigurati stavljanje oznaka iz člana 14. ovog Zakona.

### **Član 7. (Ovlaštenje za obilježavanje oružja ili municije)**

(1) Obilježavanje oružja ili municije može vršiti samo ono pravno lice, ustanova i nositelj zaliha koje za to prethodno dobije ovlaštenje za obilježavanje oružja ili municije.

(2) Ovlaštenje iz stava (1) ovog člana izdaje Ministarstvo vanjske trgovine i ekonomskih odnosa Bosne i Hercegovine (u daljnjem tekstu: Ministarstvo) na osnovu zahtjeva podnositelja, njegove mogućnosti i osposobljenosti za obavljanje poslova obilježavanja oružja ili municije.

(3) Ovlaštenje iz stava (1) ovog člana izdaje se s rokom važenja od pet godina.

**Član 8.**  
**(Karakteristike oznake)**

(1) Oznaka treba osigurati jednostavnu identifikaciju, dugotrajnost, postojanost, da se ne može lako izmijeniti ili ukloniti i u slučaju da bude uklonjena ili mijenjana da se, putem tehničkih sredstava, može prepoznati.

(2) Stavljanje oznake vrši se na siguran način i uz uslov da se sačuva tehnički kvalitet i performanse oružja ili municije.

**III. OZNAKE NA ORUŽJU I MUNICIJI**

**Član 9.**  
**(Jedinstvena proizvodna oznaka)**

(1) Oružje proizvedeno u Bosni i Hercegovini, u toku proizvodnje obilježava se Jedinstvenom proizvodnom oznakom oružja (u daljnjem tekstu: JPOO) koja minimalno sadrži sljedeće podatke:

- a) oznaku zemlje proizvodnje;
- b) oznaku proizvođača;
- c) godinu proizvodnje; i
- d) serijski broj.

(2) Municija proizvedena u Bosni i Hercegovini, u toku proizvodnje obilježava se Jedinstvenom proizvodnom oznakom municije (u daljnjem tekstu: JPOM) koja minimalno sadrži sljedeće podatke:

a) za svaki pojedinačni komad municije:

- 1) oznaku proizvođača;
- 2) godinu proizvodnje;
- 3) kalibar; i
- 4) oznaku zemlje proizvodnje za municiju kalibra 20mm i većeg,

b) za svaku jedinicu pakiranja municije:

- 1) oznaku zemlje proizvodnje;
- 2) oznaku proizvođača;
- 3) godinu proizvodnje;
- 4) kalibar;
- 5) broj komada municije; i
- 6) broj lota municije.

(3) Oznaka zemlje proizvodnje iz stava (1) i (2) ovog člana za Bosnu i Hercegovinu je „BA“ - oznaka Međunarodne organizacije za standardizaciju – ISO za Bosnu i Hercegovinu.

(4) Ministarstvo će na zahtjev proizvođača oružja ili municije donijeti Rješenje o određivanju oznake proizvođača, koja se stavlja na oružje ili municiju.

(5) U izuzetnim slučajevima JPO može sadržavati, na zahtjev proizvođača oružja ili municije, drugačije podatke nego što su iz st. (1) i (2) ovog člana, na osnovu posebnog odobrenja Ministarstva, uz opravdano obrazloženje i predočavanje poslovne dokumentacije.

#### **Član 10.** **(Mjesto JPOO i JPOM)**

(1) JPOO iz člana 9. stava (1) ovog Zakona stavlja se na vidno mjesto bitnih konstrukcijskih dijelova oružja.

(2) JPOM iz člana 9. stava (2) ovog Zakona stavlja se na vidno mjesto bitnih konstrukcijskih dijelova municije i svakoj jedinici pakiranja municije.

#### **Član 11.** **(Uvozna oznaka – UO)**

(1) Svaki komad oružja koje se uvozi u Bosnu i Hercegovinu, pored JPO koja omogućava da se nedvosmisleno identificira zemlja proizvodnje, ime proizvođača, godina proizvodnje i serijski broj, mora biti obilježen i Uvoznom oznakom (u daljnjem tekstu: UO), koja sadrži:

- a) međunarodnu ISO oznaku Bosne i Hercegovine „BA“ i
- b) godinu uvoza.

(2) Municija koja se uvozi u Bosnu i Hercegovinu, pored JPO koja omogućava da se nedvosmisleno identificira zemlja proizvodnje, ime proizvođača, godina proizvodnje i kalibar, mora biti obilježena na svakoj jedinici pakiranja oznakom koja sadrži:

- a) međunarodnu ISO oznaku Bosne i Hercegovine „BA“ i
- b) godinu uvoza.

#### **Član 12.** **(Identifikacijska oznaka oružja - IOO)**

(1) Oružje čija JPO, u postupku odnosno trenutku uvoza, ne omogućava da se nedvosmisleno prepozna zemlja proizvodnje, ime proizvođača, godina proizvodnje i serijski broj, osim obilježavanja propisanog članom 11. ovog Zakona, obilježava se i Identifikacijskom oznakom oružja (u daljnjem tekstu: IOO).

(2) IOO dodijelit će se svakom pojedinačnom komadu oružja koja sadrži:

- a) oznaku ovlaštenog lica i
- b) redni broj uvezenog oružja u Bosnu i Hercegovinu u godini uvoza.

(3) Ministarstvo će, na zahtjev pravnog lica ili ustanove, donijeti Rješenje o određivanju oznake ovlaštenog lica.

### **Član 13.** **(Identifikacijska oznaka municije – IOM)**

(1) Municija, odnosno pakiranje municije čija JPO, u postupku odnosno trenutku uvoza, ne omogućava da se nedvosmisleno prepozna zemlja proizvodnje, ime proizvođača, godina proizvodnje i kalibar, osim obilježavanja propisanog članom 10. ovog Zakona obilježiti će se i Identifikacijskom oznakom municije (u daljnjem tekstu: IOM).

(2) IOM dodijelit će se svakoj jedinici pakiranja municije koja sadrži:

- a) oznaku ovlaštenog lica i
- b) redni broj uvezenog pakiranja municije u Bosnu i Hercegovinu u godini uvoza.

(3) Ministarstvo će, na zahtjev pravnog lica ili ustanove, donijeti Rješenje o određivanju oznake ovlaštenog pravnog lica.

### **Član 14.** **(Oznaka o prijenosu ili izvozu - OPI)**

(1) Oznaka o prijenosu ili izvozu stavlja se na svaki komad oružja i svaku jedinicu pakiranja municije koji se iz zaliha svih nivoa vlasti prenosi za trajnu civilnu upotrebu ili se iz zaliha svih nivoa vlasti izvozi, koja sadrži:

- a) međunarodnu ISO oznaku Bosne i Hercegovine „BA“;
- b) oznaku nositelja zaliha;
- c) godinu prijenosa odnosno izvoza; i
- d) redni broj prenesenog odnosno izvezenog oružja.

(2) Ministarstvo će na zahtjev nositelja zaliha donijeti Rješenje o određivanju oznake nositelja zaliha.

## **IV. EVIDENCIJE**

### **Član 15.** **(Vođenje evidencije o oznakama)**

(1) Sva lica koja imaju obaveze i ovlaštenja proistekla iz ovog Zakona obavezna su voditi i održavati potpune, precizne i ažurne evidencije o oznakama na oružju ili municiji.

(2) Proizvođač oružja ili municije obavezan je voditi evidenciju o oznakama na proizvedenom oružju ili municiji u Podregistru za JPO.

(3) Uvoznik oružja ili municije obavezan je voditi evidenciju o oznakama na uvezenom oružju ili municiji u Podregistru za UO, IOO, ili IOM.

(4) Nositelj zaliha obavezan je voditi evidenciju o oznakama na oružju ili municiji koja se iz zaliha prenosi za trajnu civilnu upotrebu ili se iz zaliha izvozi, u Podregistru za OPI.

(5) Pravna lica, ustanove i nositelji zaliha koji imaju ovlaštenje iz člana 7. ovog Zakona obavezna su voditi evidenciju o oznakama na oružju ili municiji, koje su obilježili na osnovu ovlaštenja Ministarstva, u Podregistru za označeno oružje ili municiju.

#### **Član 16.** **(Centralni registar)**

Lica iz člana 15. ovog Zakona obavezna su podatke iz Podregistara dostaviti do 1. marta tekuće godine za prethodnu kalendarsku godinu, u Ministarstvo gdje se vodi Centralni registar oznaka za malo oružje, lako naoružanje i pripadajuću municiju.

#### **Član 17.** **(Sadržaj evidencije i čuvanje)**

(1) Podregistri i Centralni registar sadrže precizan opis, vrstu, model i ostale dodatne ili kodirane informacije i karakteristike oružja ili municije kao i oznake propisane ovim Zakonom.

(2) Podatke iz Podregistara i Centralnog registra, lica iz čl. 15. i 16. ovog Zakona su dužna čuvati trajno.

#### **Član 18.** **(Predaja evidencije)**

Lica iz člana 15. ovog Zakona dužna su čuvati Podregistre i predati ih Ministarstvu nakon prestanka obavljanja obaveza i ovlaštenja proisteklih iz ovog Zakona.

### **V. NADZOR I UPRAVNE MJERE**

#### **Član 19.** **(Inspekcijski nadzor)**

(1) Inspekcijski nadzor nad licima koja imaju obaveze ili ovlaštenje za obilježavanje oružja ili municije, vrši Ministarstvo.

(2) Nadzorom iz stava (1) ovog člana utvrđuje se da li se obilježavanje oružja ili municije vrši u skladu s odredbama ovog Zakona i podzakonskih akata donesenih u skladu s ovim Zakonom.

(3) Lice koje ima obavezu ili ovlaštenje za obilježavanje oružja ili municije dužno je omogućiti vršenje inspekcijskog nadzora.

### **Član 20.** **(Oduzimanje ovlaštenja)**

(1) Ovlaštenja za obilježavanje oružja ili municije oduzima se u jednom od sljedećih slučajeva:

- a) ako je ovlaštenje izdato na osnovu lažnih podataka;
- b) kada lice ne postupi u skladu s odredbama ovog Zakona i odredbama propisa donesenih za izvršenje ovog Zakona, a u ostavljenom roku ne otkloni uočene nedostatke; i
- c) onemogućava vršenje inspekcijskog nadzora.

(2) Rješenje o oduzimanju ovlaštenja za obilježavanje oružja ili municije, u slučajevima iz stava (1) ovog člana, donosi Ministarstvo.

## **VI. KAZNENE ODREDBE**

### **Član 21.** **(Nepropisno obilježavanje)**

(1) Ko ne obilježi malo oružje, lako naoružanje i pripadajuću municiju u skladu s odredbama ovog Zakona i stavi ga u promet, upotrebu ili korištenje čini krivično djelo i kaznit će se zatvorom od šest mjeseci do pet godina.

(2) Ako je predmet djela iz stava (1) ovog člana oružje ili municija u većoj količini ili vrijednosti ili je u pitanju oružje ili municija velike razorne moći i opasnosti ili djelo izvršeno u grupi učinitelj će se kaznit zatvorom od jedne do deset godina.

(3) Ko krivotvori, nezakonito briše, uklanja ili mijenja oznake koje oružje ili municija moraju imati u skladu s odredbama ovog Zakona čini krivično djelo i kaznit će se kaznom zatvora od šest mjeseci do pet godina.

### **Član 22.** **(Prekršajne odredbe)**

(1) Novčanom kaznom od 50.000 KM do 150.000 KM kaznit će se svako pravno lice koje:



- a) obilježi oružje ili municiju protivno odredbama člana 7. stav (1) ovog Zakona;
- b) od organa nadležnog za izdavanje ovlaštenja za obilježavanje oružja ili municije pribavi ovlaštenje na osnovu lažnih podataka i na osnovu takvog ovlaštenja organizira obilježavanje oružja ili municije.

(2) Novčanom kaznom u iznosu od 50.000 KM do 100.000 KM kaznit će se svako pravno lice ako:

- a) onemogući provođenje nadzora u skladu s članom 19. stav (3) ovog Zakona;
- b) ne vodi evidenciju u skladu s članom 15. ovog Zakona;
- c) ne preda Podregistar Ministarstvu u skladu s članom 18. ovog Zakona;
- d) ne dostavlja podatke iz Podregistra u skladu s članom 16. ovog Zakona; i
- e) ne osigura stavljanje oznake u roku propisanom u članu 5. ovog Zakona.

(3) Novčanom kaznom u iznosu od 10.000 KM do 15.000 KM kaznit će se odgovorno lice u pravnom licu ako:

- a) onemogući provođenje nadzora u skladu s članom 19. stav (3) ovog Zakona;
- b) ne vodi evidenciju u skladu s članom 15. ovog Zakona;
- c) ne preda Podregistar Ministarstvu u skladu s članom 18. ovog Zakona;
- d) ne dostavlja podatke iz Podregistra u skladu s članom 16. ovog Zakona; i
- e) ne osigura stavljanje oznake u roku propisanom u članu 5. ovog Zakona.

## **VII. ZAVRŠNE ODREDBE**

### **Član 23. (Provedbeni propisi)**

Ministarstvo ima obavezu, nakon stupanja na snagu ovog Zakona, a najkasnije do početka njegove primjene, donijeti podzakonske propise kojima će definirati:

- a) proceduru, uslove, mjesto oznake, postupke i metode obilježavanja oružja i municije koje se proizvodi u Bosni i Hercegovini (JPO);
- b) proceduru, uslove, mjesto oznake, postupke i metode obilježavanja oružja i municije koje se uvozi u Bosnu i Hercegovinu (UO);
- c) procedure, uslove i postupke za označavanje oznakom IOO;
- d) procedure, uslove i postupke za označavanje oznakom IOM;
- e) procedure, uslove, mjesto oznake i postupke za obilježavanje oznakom OPI;
- f) uslove za dobijanje ovlaštenja za obilježavanje oružja ili municije, formu i sadržaj obrasca zahtjeva za izdavanje rješenja te popis ostalih dokumenata koji se prilažu uz zahtjev;
- g) vođenje evidencije o oznakama; i
- h) inspeksijski nadzor.

**Član 24.**  
**(Stupanje na snagu)**

Ovaj Zakon stupa na snagu osmog dana od dana objavljivanja u „Službenom glasniku BiH“, a primjenjivat će se nakon 12 mjeseci od dana stupanja na snagu.

PS BiH broj 01,02-02-1-1361/16  
27. oktobra 2016. godine  
Sarajevo

Predsjedavajući  
Predstavničkog doma  
Parlamentarne skupštine BiH

Mladen Bosić, s.r.

Predsjedavajući  
Doma naroda  
Parlamentarne skupštine BiH

Safet Softić, s.r.

---

*Objavljeno u „Službenom glasniku BiH“ broj: 83/16 od 04. novembra 2016. godine  
Ovaj tekst je za internu upotrebu, i na isti se ne može pozivati prilikom službene upotrebe*